

Jangan Heret Institusi Kesultanan Untuk Berpolitik – Fatmi Bernama
05 Julai, 2012

KOTA BAHARU, 5 Julai (Bernama) -- Setiausaha Politik kepada Perdana Menteri Datuk Mohd Fatmi Che Salleh kesal dengan tindakan pihak tertentu yang akhir-akhir ini cuba meraih simpati rakyat dengan mengaitkan institusi kesultanan dalam hal seperti tuntutan royalti minyak oleh kerajaan Kelantan.

"Saya kesal institusi ini diheret yang akhirnya demi tujuan politik pihak tertentu semata-mata untuk meraih simpati murahan mereka," kata beliau kepada pemberita selepas mengadakan pertemuan dengan beberapa persatuan perniagaan Cina di sini, Khamis.

Mohd Fatmi, yang juga Ketua Umno Bahagian Kota Baharu, berkata pihak tertentu terutamanya badan bukan kerajaan (NGO) di negeri ini tidak wajar mengheret institusi kesultanan demi tujuan tertentu kerana Sultan adalah payung rakyat yang sama sekali tidak berpihak kepada mana-mana pihak.

Hujung bulan lalu sebuah NGO yang dikenali Gabungan Profesional Menuntut Royalti, Pendaratan Minyak dan Gas di Kelantan (Royalti) telah menggunakan potret Sultan Kelantan, Sultan Muhammad V dalam satu perhimpunan aman di hadapan Kompleks Kota Darul Naim.

Tindakan itu menimbulkan kemarahan rakyat dan Pertubuhan Pribumi Perkasa Cawangan Kelantan membuat laporan polis di sini beberapa hari lepas sebagai membantah tindakan NGO tersebut yang disifatkannya sebagai satu tindakan tidak wajar.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=678298>